



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Parlamentu Nasionál**  
**Komunikadu Imprensa**  
**18 Jullu 2023**

**JSMP prezenta nia deskobrimentu sira iha Parlamentu Nasionál  
iha Lejizlatura V:  
Prezidente Parlamentu Nasionál husu atu JSMP kontinua kontribui hadi'ak  
serbisu Parlamentu nian**

Iha 13 Jullu 2023, Ekipa JSMP audénsia ho Prezidente Parlamentu Nasionál, Exelénsia distinta deputada, Maria Fernanda Lay iha nia salaun enkontru, Gabinete Prezidente Parlamentu Nasionál. Ekipa JSMP kompostu husi Diretora Ezekutiva, Sra. Ana Paula Marçal, Jestór Programa, Sr. Casimiro dos Santos, Koordinadora Unidade LRU & UTA, Sra. Flora S. Menezes, Koordinadór Unidade POP, Jose Pereira, Ofisiál Seniór ba Advokasia, Sr. Jose Moniz, Peskizadór, Observadór Parlamentu Nasionál, Sr. Mateus Xavier no Sra. Eurosia Almeida.

Objetivu prinsipál husi audénsia ida ne'e mak dahuluk atu felisita Prezidente Parlamentu ho nia estrutura foun, nune'e mós ba Xefe Bankada no Prezidente Komisaun Especializada Permanente sira Lejizlatura VI nian. Daruak halo introdusaun badak kona-ba JSMP nia serbisu sira no ikus liu mak prezenta JSMP nia sumáriu informasaun kona-ba atividade Parlamentu Nasionál Lejizlatura V ho nia rekomendasaun sira ba Parlamentu Nasionál Lejizlatura VI nian.

“JSMP apresia aas tebes konsiderasaun Prezidente Parlamentu Nasionál foun, Distinta Deputada Fernanda Maria Lay ba karta pedidu audénsia JSMP nian hodi bele agenda audénsia ne'e iha tempu ne'ebé lais tebes. JSMP espera katak ho liderasan foun ne'e bele kria ambiente foun iha Parlamentu Nasionál iha termu serbisu no funsionamentu Parlamentu nian bele efetivu no eficiente liután iha halo lei, fiskalizasaun no foti desizaun polítika tuir mandatu konstitusionál. JSMP mós espera katak hanoin, komentáriu no rekomendasaun sira iha setór justisa no lejizlativa tantu orál no eskrita ne'ebé JSMP hato'o iha audénsia ne'e, Parlamentu Nasionál bele tau iha konsiderasaun hodi bele hadi'ak no halo mudansa iha futuru,” dehan Diretora Ezekutiva JSMP, Dra. Ana Paula Marçal.

Alende ne'e, iha audénsia ne'e mós Diretora Ezekutiva JSMP, hato'o JSMP nia kongratulasaun ba Prezidente Parlamentu Nasionál ne'ebé hanesan feto ida ne'ebé hetan konfiansa polítika hodi asume knaar Prezidente PN hodi bele lidera órgaun soberania Estadu daruak iha Timor-Leste. Aleinde ne'e, kongratula mós membru Meza Parlamentu Nasionál, Bankada Parlamentar sira, inklui Komisaun Especializada Permanente sira iha VI Lejizlatura ne'e.

Durante audéncia JSMP hato'ó mós pontu deskobrimentu sira JSMP deskobre durante halo monitorizasaun iha Parlamentu Nasionál iha Lejizlatura V nian ba Prezidente Parlamentu Nasionál. Pontu sira ne'e mak kona-ba kestaun pontualidade deputadu sira nian, produtividade, Programa Lejizlasaun Nasionál, partisipasaun públka iha prosesu halo lei, la iha tempu ne'ebé natoon ba konsultasaun públka no sumáriu ho lian Tetun ba konteúdu husi esbosu lei sira hodi bele fasilita asesu públku nian ba ezbosu lei ne'e, la iha regra própriu atu halo fiskalizasaun ba ezekusaun orsamentu estadu no programa Governu iha baze.

JSMP mós rekomenda atu iha Lejizlatura VI ne'e bele konsidera rekomendasaun ne'ebé JSMP hato'ó ona atu bele kontinua hadi'ak liután serbisu deputadu sira nian iha futuru hodi bele hasa'e produtividade no kualidade prosesu diskusaun ba lejizlasaun sira atu bele prodús lei sira ne'ebé bele responde realidade Timor nian.

Entretantu, Prezidente Parlamentu Nasionál iha ninia intervensaun, agradese no apresia JSMP nia serbisu durante ne'e hodi halo monitorizasaun ba setór justisa no Parlamentu Nasionál. Prezidente Parlamentu husu atu JSMP kontinua kontribui ba hadi'ak serbisu Parlamentu nian. JSMP hanesan parseiru di'ak nafatin tau-matan ba serbisu Parlamentu nian atu bele hato'ó rekomendasaun sira ne'ebé konstrutivu atu bele hadi'ak liután serbisu Parlamentu nian iha Lejizlatura VI nia mandatu.

Iha intervensaun ikus, Prezidente Parlamentu mós hato'ó nia pedidu ba JSMP atu bele marka audéncia ho Prezidente iha kada fulan 6 hodi troka hanoin ka informasaun sira kona-ba Parlamentu no asuntu sira iha setór justisa nian.

Iha ikus liu, JSMP mós entrega relatóriu anuál setór lejislativa no setór justisa inklui relatóriu temáka no paraser sira, mak hanesan:

#### **Relatóriu setór lejislativa :**

- Relatóriu anuál kona-ba Parlamentu Nasionál 2022<sup>1</sup>.
- Sumáriu Informasaun “Serbisu no Funsionamentu Parlamentu Nasionál iha Lejislatura V no Rekomendasaun ba Lejislatura VI”<sup>2</sup>.
- Relatóriu Temátiku Observasaun ba Kampaña Eleitoral no Elisaun Parlamentár 2023<sup>3</sup>.
- Relatóriu Temáka kona-ba Alterasaun ba Artigu 1475 Kódigu Sivíl kona-ba Rekonesimentu Kazamentu: Legaliza Diskriminasaun Relijioza no Violaasaun Direitu Umanus<sup>4</sup>.

---

<sup>1</sup> Bele asesu relatóriu kompleitu iha website JSMP: <https://jsmp.tl/wp-content/uploads/Relatoriu-POP-2022-final-print-25-Abril-2023.pdf>

<sup>2</sup> Bele asesu relatóriu kompleitu iha website JSMP: <https://jsmp.tl/wp-content/uploads/Sumariu-serbisu-no-funsionamentu-PN-V-ho-rekomendasaun-ba-VI.pdf>

<sup>3</sup> Bele asesu relatóriu kompleitu iha website JSMP: [https://jsmp.tl/wp-content/uploads/Relatoriu-ElPar-2023\\_TETUM.pdf](https://jsmp.tl/wp-content/uploads/Relatoriu-ElPar-2023_TETUM.pdf)

<sup>4</sup> Bele asesu relatóriu kompleitu iha website JSMP: [https://jsmp.tl/wp-content/uploads/Relatoriu-tematika-Artigu-1475-KS\\_TETUM.pdf](https://jsmp.tl/wp-content/uploads/Relatoriu-tematika-Artigu-1475-KS_TETUM.pdf)

**Relatóriu setór justisa :**

- Relatóriu Anuál Setór Judisiáriu 2022.
- Relatóriu peskiza “Harmonizasaun Idade menór iha Kódigu Penál no Kódigu Sivíl<sup>5</sup>.
- Aktualizasaun Justisa “Diferensa Interpretasaun no Aplikasaun Artigu 145 Kódigu Penál no Artigu 154 Kódigu Penál iha Kazu Violénsia Doméstika<sup>6</sup>.

**Paraser Jurídiku:**

- Esbosu kona-ba Lei Rekonesimentu ba Relijiaun no Liberdade Relijioza.
- Estrutura Alternativa ba Esbosu kona-ba Lei Rekoñesimentu ba Relijiaun no Liberdade Relijioza.

Relasiona ho paraser JSMP nian ba esbosu Lei kona-ba Rekoñesimentu ba Relijiaun no Liberdade Relijioza ho nia estrutura alternativa no relatóriu temátika kona-ba alterasaun ba Artigu 1475 Kódigu Sivíl Prezidente Parlamentu hato’o katak sei entrega ba iha Komisaun Especializada Permanente ne’ebé tutela ba asuntu ne’e.

Atu hetan informasaun liutan favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
[info@jsmp.tl](mailto:info@jsmp.tl)  
Website: <http://jsmp.tl>

---

<sup>5</sup> Bele asesu relatóriu kompleitu iha website JSMP: <https://jsmp.tl/wp-content/uploads/JSMP-Product-Report.pdf>

<sup>6</sup> Bele asesu relatóriu kompleitu iha website JSMP: [https://jsmp.tl/wp-content/uploads/JSMP-AtualizasaunJustica\\_TETUM-1.pdf](https://jsmp.tl/wp-content/uploads/JSMP-AtualizasaunJustica_TETUM-1.pdf)